

本朝分省人物考

人物考卷之七十九目錄

湖廣荊州府

王賢

唐本忠

附孫素

劉翼

裴璉

裴承祖

鄒師顏

唐貞

譚思敬

傅獻

韓守益

附子春

劉雋

楊溥

劉傑

楊翰

傅啓讓

張純

何忠

王恂

汪浩

李愷

王軾

劉懋

趙鑾

趙士賢

汪宣

蘇昭

伍文定

袁宗臯

鄒文盛

潘子秀

劉思賢

劉寓生

張璧

鄧鉉

王俊民

高文光

王之誥

張居正

陳大賓

劉一儒

曾可前

袁宗道

附弟宏道

本朝分省人物考卷之七十九

湖廣荊州府

王賢

王賢字希昭江陵人性公直尚義洪武初入太學與友王讓同居讓以事往江南以故人所贈銀十兩并已衣一篋托賢收之未幾賢除鹽城尹攜之任讓回授泌陽令尋卒後十餘年賢致仕歸召讓子以所寄與之其子曰父素貧安有物寄乎沒時言未及此賢曰人無信不立如子卻之後何面目見故人於地下耶遂強授之其子發封見父故衣乃泣而受

唐本忠

唐本忠先監利人徙荆山幼聰哲才氣不凡厲志問學會倪文俊起沔陽聞本忠名召之本忠拒不住洪武初舉經明行修授京山教諭建宮墻育士類甚有剗始之績後以事被逮免歸卒孫素景泰癸酉舉人知崑山有殊政官舍圃中種茄諸子每食人給一枚後徵南道監察御史羸馬敝衣時所推重

劉翼

劉翼字子羽監利人洪武初以明經授安慶訓導拜監察御史風節稜稜挺然嶽立時親王有假法駕出

城者已獲命俞 旨翼爭之愈力以忤旨逮繫十年
方釋而歸

裴 璉

裴璉監利人洪武中以明經薦知劔州遷浙江僉事
執法不撓被誣褫職起監察御史以平寇功擢河南
副使以事免尋改刑部主事歷侍郎璉好持風節事
所當爲卽得喪夷險以之

裴承祖

裴承祖長陽人洪武中以秀才異等拜監察御史命
同御史張亨等八人署都察院事承祖劾奏武定侯

史科
郭英私蓄家奴擅殺無憚 上命議其罪已而宥之
尋出爲浙江僉事治獄平允不事苛刻擢江西按察
使

鄒師顏

鄒師顏字希聖宜都人洪武中監生授戶部主事永
樂初改行在監察御史劾御史李公敏娶監囚親屬
爲妻廉恥道喪 詔命都察院鞠之風紀肅然權貴
斂避陟大理寺丞擢禮部右侍郎

唐貞

唐貞夷陵人領洪武丙子鄉薦歷官兵科給事中抗

直敢言聲起 朝宁間永樂己亥卒于官時 仁宗
以太子監國因爲文遣給事中胡廙往祭有屢進直
言恭勤不懈之句卒後家止土屋一區不蔽風雨其
廉如此

譚思敬

譚思敬巴東人洪武二十三年以貢任四川大竹知
縣徵授兵科給事中以言事切直出知岷縣尋陞山
西平定州守卒于官思敬守已愛民勸課農桑民皆
殷富至今人思慕之今鄉人相傳行誼高卓一廉自
矢累官回行李蕭然不治廬舍

傳獻

傳獻松滋人吳元年授江西行省官陳友諒旣平擢
中書省左丞歷叅知政事與李善長定律令奉 上
德意務從簡當洪武元年 上郊廟議時京師火災
四方水旱相仍 上諭修省獻以天心仁愛爲對引
罪自居於是詔中書省及臺部集官儒講求彌災事
宜

韓守益

韓守益石首人洪武中監生授宜都教諭作士有功
召拜監察御史與子春同改右中允守益問學博雅

屬文其於詩尤渾沉可誦先是方孝孺入補建文
召改翰林院爲文史文翰二館子春守益列侍法筵
有言必盡

劉雋

劉雋字子奇江陵人父從政夢天降赤幟上書雋字
是夕雋生因以爲名幼磊落不羈讀書日記數千言
下筆成文蔚然可觀洪武乙丑登進士改翰林庶吉
士擢駕部主事陞郎中革除中遷右侍郎尋改侍中
成祖入正大統復改兵部左侍郎本年陞尚書總制
十二月命嚴武臣冒襲之禁初上卽位念諸將勤

勞旣老而無子孫弟姪者特許養子及婿襲職一次
用報前功其後有貢緣易姓冒襲者故特禁之又定
軍功襲職例四年丙午日南于紀王師問罪擇廷臣
有文武全才者總督軍務雋首受命運籌畫策夜以
繼日師壓賊境罔不克捷旣獲元惡餘孽以恩結之
日南之民得以靖謐凱旋 上深嘉之六年餘孽嘯
林堡構患愈深 朝廷以雋聲威昔著夷賊攸伏仍
遣與大將軍黔國公往勦之雋曰此行吾當盡除逆
賊以死報國師行萬里直抵化州夷人聞之懽忻鼓
樂獨首賊抗令不服雋好謀慮勝親冒矢石令軍前

後掠敵所至輒有奇效一日以前軍得捷襲寇至大安海口遇颶風大作揚沙走石莫辨南北進則人馬難行退則敵衆掩合且戰且行略無退意卒致後軍弗前勢孤援絕遂陷賊圍挑之使順雋罵賊曰劉尚書雖死天朝豈無劉尚書乎王師復至爾輩死無遺類口誦杜甫詩曰出師未捷身先死長使英雄淚滿襟賊見不協鼓衆而進遂遇害事聞上悼慟不已皇太子諸王皆遣祭後仁宗馭極遣官諭祭賜以誥命贈榮祿大夫柱國少傅謚曰愍節官其長子爲給事中

楊溥

楊溥字宏濟石首縣人夙稟醇質刻志苦學革除己卯舉湖廣鄉試第一胡儼典文衡批其文曰初學當避三舍老夫亦讓一頭地旣而中庚辰進士授翰林院編修永樂二年仁宗正位東宮置司經局洗馬兼編修一日東宮問漢廷尉張釋之之賢溥對曰釋之誠不易得然世豈無其人但無文帝寬厚仁恕之君用之爾釋之固難得文帝尤難得也退采文帝關治道者編爲事類以進皇太子嘉納之十二年七月車駕北征東宮遣使奉迎稽緩漢王高煦譖之

上怒曰此輔導者之咎也黃淮先至下之獄楊士奇
金問繼至上曰楊士奇姑宥之朕不識金問何人
乃爾得侍東宮命法司鞫之詞連溥及芮善王愷遂
俱逮繫淹禁十年家人供食數絕又上命叵測日
與死爲鄰溥勵志讀書不輟同難者止之曰勢已如
此讀書何爲日朝聞道夕死可矣五經諸子讀之數
回不以貧窶患難介于中仁宗登極釋溥擢翰林
院學士入閣典機務本年陞太常寺卿仍兼學士洪
熙元年正月己卯建弘文閣于思善門之左上親
握閣印授溥曰朕用卿等于左右非止助益學問亦

欲廣知民事爲理道助卿等有所建白卽用封識以
進十一月丙申溥密疏言事 上褒荅之賜寶鈔綵
幣宣德初復還內閣預修 兩朝實錄以溥爲總裁
官元年高煦反旣平陳山請襲趙王溥與楊士奇執
不可趙邸獲全十二月 上召溥語及治兵之道溥
曰兵貴訓練有方撫養得宜 上曰養之厚則得其
心練之精則得其用必氣銳志果而後可用若不訓
養一旦驅之矢石之間進退失措何望有濟溥曰誠
如 聖諭四年正月 上御齋宮召溥諭以 祖宗
創業之難守成之不易自古國家禍亂每生於不虞

溥以聖人治不忘亂安不忘危爲對 上曰滄海之大皆由江河之助古之君臣更相戒飭克致太平比來人臣多進諛辭卿宜輔朕於善道對曰直言非難受言爲難 陛下樂聞讜論臣敢不殫竭愚衷是年秋以母喪去任詔奪情起復居禁中以便咨訪如弘文故事不與機務十月 上幸文淵閣制詩一章賜之五年正月實錄成賜溥白金衣幣九年秩滿陟禮部尚書兼學士十年 英宗繼統命溥復入閣與楊士奇楊榮同知經筵正統三年總裁 宣廟實錄成加少保禮部尚書兼武英殿大學士溥首言自古聖

賢之君未有不由學而能致治者 先帝在御時時

切論此事 皇上肇登寶位必明堯舜禹湯文武之

道以興唐虞三代之治早開經筵以進 聖學豫擇

講官以供其職及選左右隨侍之人輔養本原 上

皆嘉納又疏言近年清解軍士北人苦于瘴癘南人

苦于嚴寒又西北二邊急于防守而所在壯勇之人

乃發戍南方且洪武中犯死罪者不分南北發戍所

以宥其死而懲其惡永樂宣德以來憫其遠道艱苦

留操近地所以全其生而圖其用今邊卒清解者宜

悉從南北所宜發戍庶幾人宜水土兵政有備詔廷

臣議行之十一年卒于官年七十五贈太師謚文定
溥爲人謙謹小心篤于操履雖延接吏卒亦不敢慢
嘗曰士君子一言一行幽明無愧然後無負于父母
生身之恩又曰人必有躬行之實然後可以訓子孫
初鄉試爲首選胡儼典文衡後儼爲祭酒溥已在禁
垣終身執門生禮儼亦不辭人兩高之

劉傑

劉傑江陵人幼敦行以孝弟稱于宗黨永樂十二年
舉經明行修擢吏科給事中彈劾無所避出同憲臣
振覈師旅且物色機密傑不欲要功希寵士論賢之

尋補雲南布政司叅議分轄金滄興利剔弊民夷翕服謝政歸甚貧時謂各位不及愍節而廉介稱之滇人至今崇祀

楊翰

楊翰荊州人永樂間以貢授直隸廣德州守坦夷周慎勤恤民隱興學育才善政最多嘗以事被逮父老詣闕懇留朝廷嘉之遣官慰勉賜勅還職尋陞戶部主事尤能其官

傅啓讓

傅啓讓石首人永樂壬辰進士歷河南僉事清慎有

爲奏築堤以禦河水九載考最中州士民奏留之命
復原職陟大理寺少卿獻議公平尋出督餉浙江

張純

張純字志忠江陵人永樂辛丑進士官德初授監察
御史值歲大旱乃捐銀帶簪珥易粟爲粥活民正統
中擢僉都御史上言十三事疏上允行撫畿內風紀
丕振入掌南京都察院拔儻黜貪尤得政體擢兵部
尚書

何忠

何忠字廷臣江陵人舉進士爲監察御史有能名永

樂中以言事陞政平州知州忠聰敏有政事才居官廉慎不妄交處爲御史持正論莫敢干以私當言事時忠以疾家居衆御史以所言事示之忠爲增損皆切于事情謫知政平民皆翕然安其政雖深谷蠻酋素頑獷者亦樂於趨事後以計事至布政司寧橋之敗賊乘勝進逼城下人心惶懼成山侯王通詭謀與賊和爲書遣山壽家人遺賊謂朝廷宥其罪賊果信引兵退先是密遣人奏事俱被賊遮留至是賊以朝廷宥罪遣頭目陳渭老等奉表謝恩通遂遣忠及千戶桂勝與渭老等同入朝實欲上達賊情請益兵

征勦至昌江內使徐訓泄其謀忠等遂被拘留賊素聞忠剛介有學識誘令從已忠不聽後以刀鋸臨忠曰從則生不從則死忠瞋目視賊大罵曰我天朝臣子恨不斬汝以歸報朝廷肯從汝反求活耶罵不絕口又以刃逼勝勝亦不屈忠父子及勝同日俱遇害時宣德三年五月忠初被拘卽賦詩以死自誓云

王恂

王恂字用誠公安人初名振以同中官名改之宣德庚戌進士選翰林院庶吉士授檢討轉修撰遷大理

寺丞巡撫貴州克舉邊務民夷懷畏召改右庶子管
司業事尋擢祭酒恂謹厚喜誘迪諸生循循不倦比
卒遣官致祭給舟歸喪

汪 浩

汪浩字弘初石首人景泰辛未進士授南京大理寺
副天順初出補四川按察司僉事時成夔潼嘉諸郡
寇作浩多方經略擒斬萬餘擢僉都御史巡撫四川
平劇賊趙鐸等加副都御史往討都掌叛夷尚書程
進督戰益急浩言發其窖藏軍餉益裕卒致底定論
者以其殺降謫配北鄙人皆寃之所著有平西錄

李愷

李愷江陵人景泰間舉人知永新縣縣有梅花峒民梗化不趨賦役者殆百年愷單車詣峒諭以恩威擇數百人詣縣克耆吏義官人皆感服擢吉安府同知

王軾

王軾字用敬公安人以進士授大理評事審錄四川用刑平允陞四川副使值貴州黑苗叛播州土官請征之軾廉知其情遣使招諭叛苗咸服擢本司按察使清決滯獄囹圄爲空進僉都御史提督巡江轉副都御史總理京儲剋弊剔蠹尋討貴州酋婦來魯事

平加太子太保謚襄簡子貢賞領鄉薦有父風賞早卒以孝行聞

劉懋

劉懋字勉之江陵人成化壬辰進士拜刑科給事中封駁無所避值權閹汪直用事懋首劾之尋論昭德貴妃專寵被杖詔獄復出爲浙江僉事憂歸不起懋明爽遇事剖決不滯疾惡太嚴與人不苟合家居數十年足跡不至城市號不垢子

趙鑾

趙鑾字廷振江陵人成化辛丑進士授大理評事廉

恕詳審擢雲南僉事訟牒有午治之無留滯土官不法及掣肘難治者立寘于法勦平菁寨邊境用安建昌與南詔土酋讐殺鑾躬往撫定朝論臆之會擬遷擢病卒

趙士賢

趙士賢字孟希石首人舉弘治癸丑進士爲翰林庶吉士初爲戶科給事中內艱服闋改授兵科累遷都給事中前後所上疏如廣聖學躬儉德省賦稅厲士風及選帥練兵令勦戚子弟入國學禁道流爲太常正官皆切治體有都御史子冒功乞陞者劾沮之出

使蜀楚遼諸府不受餽遺覈大同邊儲力去姦弊倉
官待支多老且死者曲爲區處俾生還鄉邑後遇諸
塗皆泣送不忍去逆瑾竊政不悅于都御史雍泰撫
嘗薦泰者孟希與馬恭毅劉東山俱落職爲民瑾敗
乃復起爲江西布政司左叅政時羣盜方熾按行郡
邑夜宿新塗賊突出山澤間孟希爲所擁義不往諭
以禍福賊羅拜曰我輩安敢犯公惟藉以自庇耳且
擁且行至會昌賊所過殺戮孟希輒止之曰若等與
彼皆吾民也汝欲殺吾民寧殺我耳賊爲少戢會官
兵四集孟希乃得出歸藩司病卒年五十二

汪宣

汪宣字懋卿江陵人成化甲辰進士初知華亭拜監察御史時權閹李廣敗頗連大宦太宰屠瀟以爲不必深究宣疏劾之數其黨護及壞選法數事人稱其難巡視松江貪墨望風解綬而去

蘇昭

蘇昭宜都人童稚時日記千言後爲南平令致仕一日江濱遇一孤子守骸而泣昭問其由對曰父知巴縣沒于此死無所依昭遂出貲斂之助還成化間邑人杜姓者五人飢甚逼食于人執于官誣以盜罪昭

上書當道得伸

伍文定

伍文定松滋人弘治二年進士初授常州府推官以
事忤逆瑾已陞成都府同知追逮詔獄爲民瑾誅補
嘉興府同知平桃源賊有功都御史陶琰以異材薦
于朝陞河南府知府時江西吉安多盜乃調吉安至
卽禽永豐巨寇賴招壽等四百餘人平桶岡賊得渠
魁謝志山等宸濠反詐奉 太后聖旨移檄遠近人
心惶惑文定卽同都御史王守仁倡議討賊提兵攻
南昌濠舟師還救迎戰于王家渡文定立矢石中督

戰砲火燎其鬚而不爲動濠遂就擒陞按察使進都
察院右副都御史提督操江久之以疾致仕尋起爲
兵部右侍郎陞右都御史屬雲南有安鳳之亂陞兵
部尚書兼都御史提督雲南川廣軍務未入境賊平
時苾部屢不靖文定欲乘兵力勦之以伸威百蠻四
川按臣戴金力言其非上遽降旨罷兵召文定還
督團營文定因乞休許之至是卒詔賜祭葬如例文
定孤忠自信遇事敢爲不能與時爲俯仰故功烈甚
著然以狙悟終其身爲志士所深惜云

袁仲臯

袁宗臯字仲德石首人少俊異有大志弘治庚戌登進士辛亥 恭穆興獻皇帝初分封安陸之國選克長史勵精奉公 獻皇慶得賢相事無大小悉裁決焉嘗降 溫旨袁長史厚內方外正學篤行盛德長者也益見信任釐弊戢姦衛從有強取民財者廉之不少貸由是府中憚其嚴肅無敢擾州民賴以安堵豪民萬世傑等緣王庄疆界結訟數案不能直致鳩衆張幟不逞撫按莫敢誰何宗臯單騎詣之舉正其界翕然受命癸丑陞正四品俸級丁巳 獻皇奏臯歷任旣久輔導以正宜加陞擢 孝皇帝授正三品

進階通議大夫正德乙亥 獻皇復表臯清謹有年
政事練達 武皇帝賜旨勞之進江西按察使秩仍
舊輔導辛巳 世宗入繼臯扈從至良鄉 上覽禮
部具儀謂臯遺詔以吾嗣 皇帝位非爲皇子臯曰
主上聰明仁孝實天啓之蹕次京城行殿輔臣楊廷
和固請 上由東安門入臯曰 今上繼序卽帝位
可復行藩王禮耶因正色厲聲呼闕大明中門入登
大寶臯翊贊新政益效靖恭凡所建白悉爲國家無
窮之基四月二十二日陞吏部左侍郎兼翰林院學
士先 武皇帝時內豎乘逆瑾餘烈縱恣不戢臯首

請裁抑止給役禁闥不得預政事典兵柄繇是闥尹
屏縮朝綱肅清五月初十日遷禮部尚書兼文淵閣
大學士素剛正清介入居台衡大小師承京師苞苴
無敢至門者八月初二日 上簡儒臣備日講臯預
知經筵敷陳墳典明鬯剴切 上注聽爲之改容因
欽賜奴婢各六人初爲長史時中酒晝寢偶夢一美
姬扶床跽請曰妾備李白洲下陳今願治相公帷箔
驚覺召黃夫人語異之旣而李以黨宸濠敗妻孥沒
入官至是所受賜婢李姬預焉則昔夢中人也定數
之不可移如此九月朔遘疾 上命御醫診視中官

問病革上疏敬還所賜奴婢不從遺命各放寧家
寢疾七日卒年六十九謚榮襄

鄒文盛

鄒文盛字時鳴公安人弘治癸丑進士授吏科給事
中命覈兩廣兵儲上言災異十事按事遼東條例邊
計進戶科疏陳崇節儉省課稅飭邊備廣儲蓄深切
時政忤逆瑾出守保定府擢山東叅政會劇賊破州
縣極意撫輯遷雲南布政使值貴州土酋嘯聚香爐
山擢副都御史巡撫征勦克之蠻獍懾服賜勅褒資
進右都御史掌憲留臺振肅風紀僚屬不敢骫法以

千政者進南京戶部尚書召入戶部值四方水旱蠲租賑荒調停邊餉悉中時宜忤宰輔乞休卒贈太子少保謚莊簡

潘子秀

潘子秀字人傑江陵人幼穎異日記數千言弘治癸丑進士授戶部主事有能聲馬端肅器之調文選員外郎精于品藻補江西提學副使振教造人卓有可紀

劉思賢

劉思賢字用賓石首人弘治丙辰進士歷戶部郎中

正德間以忤逆瑾繫獄免會瑾誅起重慶知府累遷工部侍郎恭慎端慤踐履不苟囊無儲物寒約終身

劉寓生

劉寓生字奇進石首人弘治乙丑進士選庶吉士與湛若水穆孔暉講明性學拜監察御史抗直敢言以忤逆瑾免嘉靖初起福建僉事致仕杜門寡交自奉類寒素云

張璧

張璧字崇象石首人早擢省闈屢試南宮不利益肆力學問晝夜探索僑寓京邸起居服食人所難堪而

一燈伊唔誦常達曙時學士劉五清汪石潭有聲詞垣嘗謂人曰張崇象鳴世才也正德辛未舉進士選翰林庶吉士授編修文望益起甲戌乾清宮災上修德勤政講學三事壬午世宗龍飛首開經筵壁與進講器貌端肅儀矩偉然敷陳古訓明懲剋切時司寇林見素以事待罪壁講君使臣以禮有耆德舊臣當加敬禮之語上爲之改容乙酉被命以官諭出典南畿文衡一時髦俊多在甄錄戊子父憂卹典加厚命給驛還庚子陞南京大宗伯癸卯召還北部通議建太廟羣論紛紛酌議以對制遂定欽天太醫

監院率多冗員順天鄉試舊多冒籍壁奏覈去五十餘人宿弊一清與河南許一時並進內閣人望翕然以病瘞卒年七十一謚文簡

鄧 鉉

鄧鉉江陵人領正德丁卯鄉薦授南陽知縣性清介不阿治行茂著徵入爲御史以直忤于時遷柳州守布德施惠民夷懷服推廣東副使有遺愛及巡海會有採珠之令鉉焚香與諸從事誓一無所取致仕歸家徒四壁清苦若儒生士林重之

王俊民

王俊民字用章號南湖荊州人正德甲戌登進士第
銓授蒲州知州擢大名府同知有巨璫家故居城中
怙勢侵占人地宅一切奪還之陞福建僉事兵備汀
漳汀漳道連三省多盜每訟必牽引數十人經年不
結至卽理滯平寃庭無留案時閩中叛卒糾平民爲
漳南巨患設策分布民兵往捕并其黨擒之地方獲
安秩滿擢廣東左叅議時田州土官煽亂 朝廷命
出師征勦冒險觸瘴督糧餉以給軍士賊平轉山西
副使後改福建巡海副使內艱服闋補河南副使兵
備大名轉廣西右叅政陞廣東按察使轉本省右布

政入覲京師先是部使者欲誣入人罪俊民與論齟齬部使者銜之竟爲陰中乃調雲南會有詔徵滇產黃金丹青甚亟移文督派恐小民受擾每就中必爲寬假雖見忤使者不顧安南構亂時議欲討平之乃區畫兵食日懷隱憂會有驅兵民轉餉者地方洶洶自危一日閱士轅門軍衆鼓譟露刃欲爲變羣相視錯愕莫知所爲俊民徐呼使前諭以利害皆感泣聽命毋敢譁者而亂隨以定疾作卒平生恥奔逐初第坐其姊爲宗人妻得外補其後姊氏逝久且乏嗣制得無碍俊民一無所陳請或問之曰某若是是干進

也竟不聽雖久官家無他贏論者謂其爲廉介君子

周文光

周文光公安人登嘉靖戊子鄉薦簡重雅飭好學強記旁羅百氏幼失怙母苦節自貞光善事之孝養備至初授四川巴縣令勤慎慈惠視民若傷推鞠以情幾至無訟賦役與民期會不事鞭笞民亦無後時興利除害皆以實心行之一邑仰其廉平比入覲相率繪像私祀無不願其復任者然光素不樂仕進懇乞休歸銓司爲改廣之遂溪至任甫七日慨然思隱遂三和淵明歸去來辭以歸當道莫能挽留居家二十

餘年絕迹公庭時或困于衣食有司者爲餽粟帛皆
不受清介之操始終無間生平學陶評者謂與潛後
先無忝云所著有擬陶詩及自祭傳銘等篇并北觀
稿燕翼錄懷谷詩文稿若干篇

王之誥

王之誥字告若石首人倜儻有大志不喜浮沉甲辰
進士初授吉水縣令擢戶部主事庚辰虜寇近邊進
逼京師誥以轉餉時給戎務練達改兵部郎中才猷
益顯陞河南僉事征施尚詔有功轉叅議尋陞山西
叅政時分宜父子中外夤結倚附者多誥獨中立事

敗 肅皇重之徑陞遼東巡撫都御史召入爲兵侍
掌團營陞南京兵部尚書尋轉北刑部尚書誥性愷
直不少委曲又執法積忤中貴遂以母老歸養雖歷
大官囊橐蕭然可謂清白君子矣

張居正

張居正字叔大江陵人嘉靖丁未登進士高第改翰
林院庶吉士授編修居正頎然三三秀眉目美鬚髯
鬚幾至腹沉深有城府莫能測也時嚴嵩首輔而忌
徐階諸善階者皆避匿居正行意自如嘗考會試其
門生自喜客于嵩能得嵩意居正衆斥之曰李樹不

代桃僵耶亟去毋辱吾門衆稍莊憚之遷右春坊左中允領國子司業事待諸生嚴亡所寬假而獨與祭酒高拱善尋還理坊事遂以選侍裕邸講讀王賢之邸中中貴人亦無不賢居正者進右諭德兼侍讀預校永樂大典尋進翰林院侍讀學士領院事世廟崩階草遺詔以居正遷禮部右侍郎月餘進吏部右侍郎兼東閣大學士尋克世宗實錄總裁至秋進禮部尚書兼武英殿大學士亡何加少保兼太子太保時年僅四十三當居正之進閣閣臣凡七人居正最後拜獨謂輔相體當尊重於朝堂間出一語輒

中的人以是愈畏憚之重于他相矣當是時 天子
頗好游而重武居正上疏言六事一曰簡議論二曰
振紀綱三曰重詔令四曰覈名實五曰固邦本六曰
飭武備疏上褒諭下部院議行居正以善筆札諸公
有密勿疏草多委之如救給事中石星御史詹仰庇
停取戶部金三十萬請 皇太子出閣講學其草皆
出自居正時同列諸公去且盡獨居正與高拱在兩
人相得益密會北虜請入貢通互市亦惟居正贊之
初以滿三載加柱國進太子太傅再以六年滿加少
傅吏部尚書建極殿大學士兼支大學士俸遼東戰

功加太子太師和戎成加少師 上一日甫視朝忽
馳而下躡於陛間第云國有長君社稷之福語且不
了了居正與拱趨而掖之起還宮卽不豫者月餘居
正察知 上骨立神朽慮有叵測爲處分十餘條札
而封之使小吏持以投馮保卽有報拱者急使吏跡
之則已入矣拱亦不知爲何語第恚甚至閣面詰居
正曰昨密封之謂何天下事不以屬我曹而屬之內
豎何也居正面發赤不能荅徐而曰吾日與飲食通
公安能一切瞰我拱謂實然不復置臆而 上崩拱
與居正懽然具遺詔草拱復自具草以聞凡數事皆

欲敎司禮權歸內閣馮保聞之意不善也 上方諒
閣拱有請必報可以爲能得 上心而嗾所善言官
四五人列䟽論保謂必下拱卽擬 旨逐之而使其
心腹韓楫報居正行且建不世功與公共之居正陽
笑曰去此閹若腐鼠耳卽功胡不世也陰使人馳報
保得預爲備而以計逐拱居正旣代拱首卽請還楊
博吏部頃之 上御平臺召居正面諭曰 父皇昔
在御日嘗一再聆德音謂先生忠而高拱邪先生幸
自愛悉心見輔因賜居正金幣及繡蟒斗牛服居正
頓首泣謝謂今國家要務惟在遵守 祖宗舊制不

紛紛更改至于講學親賢愛民節用又君道所先
乞 聖明留意 上曰善時 上幼冲虛已委任居
正居正旣得國亦慨然以天下爲已任中外想望丰
采是時 上當崇奉 兩宮故事 天子非嫡生而
尊 皇后稱 皇太后若生母亦稱 皇太后則別
徽號于 皇后以別之馮保欲媚 上生母李貴妃
乃風居正以並尊於是下議尊 皇后曰仁聖皇太
后 皇貴妃曰慈聖皇太后而 兩宮不復別矣居
正之爲政大約以尊 主權課吏實信賞罰一號令
萬里之外朝下而夕奉行如疾雷迅風無所不披靡

乃媿快于意 上以師臣待居正凡所下 卽札皆

不名稱先生或稱元輔南京戶科給事中余懋學疏

請行寬大之政居正以爲風已奪其職爲庶人御史

劉臺居正所取士也由刑部郎改居正擬以爲德而

臺居頗近數刺得其陰事而惡之俄出按遼東遼東

捷御史不當報而臺誤報居正以故事裁斥臺臺益

惡居正且自分不得免遂抗章極論十餘事居正怒

甚見 上俯伏而泣不肯起 上爲下御座以手掖

之而曰先生起吾爲逮臺竟其獄以慰先生臺至下

詔獄 上命內閣杖之百而遠戍之時物議頗觝制

居正不自安乃具疏爲解得不杖而奪職還里尋禮部舉會試而次子嗣修與呂調陽之子與周皆中式居正等以嫌請避不允於是假其柄於四維次名二甲第一旣進御上啓姓名則拔嗣修一甲第二人而名居正謂曰無以報先生功貴先生之子孫以少報耳居正叩首謝亡何其父封少師文明卒同列以聞上遣司禮中貴人慰問起居絡繹道路三官賻贈白金共一千五百兩鈔萬錠時加恩居正雖踰於他相數十倍然未嘗有意留之同年戶部侍郎李幼孜等倡諛辭謂上冲年不能親萬幾一日不可無

相公遂以奪情之說進而居正惑矣乃陽上書請乞
守制而露意馮保使固留之時有識者皆以爲非而
王錫爵與其僚張位趙志臯吳中行沈懋學移書李
幼孜責使諫止且責給事中不言幼孜唯唯而已

上遣吏部尚書張瀚慰留宣 旨瀚在吏部素與居
正善然不敢以奪情爲是而左都御史陳瓚倡六部
請留居正禮部馬自強頗持之未上而居正惠則請
于 上謂瀚昏耄勅令致仕矣居正見人情已定乃
始乞歸葬其父再疏始允使尚寶司少卿鄭欽錦衣
衛指揮僉事史繼書護歸以三月爲期葬畢卽上道

仍命撫按諸臣先期馳賜璽書敦諭範白金爲印記
曰帝賚忠良以賜之如先朝楊士奇張孚敬例得密
封言事仍戒內閣臣調陽等有大事毋得專決仍馳
驛之江陵聽先生處分居正當行 上及 兩宮各
賜道里費旣朝辭復請見于平臺 上撫諭之曰朕
不能捨先生恐傷先生懷是以忍而允所請雖然國
家事重朕將何所倚居正乃勸 上以大婚之後宜
搏節愛養留心萬幾因伏地而哭 上亦爲之哽咽
墮淚及歸畢葬且還朝而兵備憲臣與分守聞帥約
請居正閱操用大帥禮居正欣然許之改服 上所

賜蟒繡以御禮成出金帛勞賞加等時遼東奏大捷
上復歸功居正遣使馳諭俾定爵賞居正爲條例以
聞旣過良鄉抵郊外 詔遣中貴何進宴勞于真空
寺口諭先生以午入卽召見平臺以未入則質明見
而 兩官亦各遣大璫李琦李用宣諭賜八寶金釘
川扇御膳餅果醪醴百僚復班迎以次日質明入朝
上延之平臺慰勞懇篤且詢以途路所見歲計物情
與北虜衰敗之狀良久乃予假十日而後入閣仍賜
白金綵幣 上罇御膳因引見 兩官時 上漸備
六宮太倉所儲金錢多所宜進居正乃因戶部進

御覽數目而陳之謂每歲入額皆在其內錙銖畢盡
因甚憂其不可繼而請 上置之坐隅時賜省覽量
入爲出罷節浮費疏上留中 上復傳 旨工部置
錢應用居正亦以利不勝費止之時言官請停蘇松
織造不聽居正面爲宛曲以請得損數之太半復請
停修武英殿工及裁省外戚遷官恩數 上多曲從
之一日 上御文華殿居正侍講讀畢而以給事中
所上災傷疏聞因謂鳳陽及江南諸郡屢無歲而徐
宿之間民至屑榆皮爲粥不早賑之則相聚爲盜賑
之不可緩 上曰惟先生所處居正復奏 上至仁

愛民如子凡請蠲請賑無不賜允而在外諸司往往營私背公剝民罔上非惟不體皇上子惠困窮之德意且不知臣等所以贊皇上之愚衷殊可恨也臣等不勝憤懣竊以爲此輩若遇聖祖不知當處以何法上首肯之于是有蠲貸而督奉行者之旨中外肅如也時復當會試大學士申時行與大學士許國爲主司而居正二子懋修敬修與四維之子泰徵皆中式居正扈上謁諸陵歸卽具疏乞休凡再上而天子慰留懇切最後手書稱慈聖口諭張先生親受先帝付托豈忍言去俟輔爾歲至三

十而後商處先生母復興此念居正乃出而懋修即
狀元及第矣居正當上初年嘗慕古君人治亂之
事而條治者八十一亂者三十六以應陰陽之數繪
而爲圖以俗語解之使易曉至是復屬儒臣紀高
皇帝及列聖寶訓實錄分類而成書凡四十又請
立起居注紀上言動與朝内外事爲修史張本日
用翰林臣四員入直應制詩文及備顧問上皆優
詔報許亡何居正病上時下諭問疾大出金帛以
爲醫藥資凡四閱月竟不愈上始令四維等理閣
中細務而大事猶卽家令居正平章居正始自力而

其後憊甚不能起聞計聞上愴悼輟朝贈上柱國
謚文忠遣管葬于是四維始爲政而事漸變矣後以
言官劾其三子躡取上第俱削籍爲編氓始奪上柱
國少師兼太子太師再奪文忠謚後又追論不已且
謂其以私構成遼庶入憲鄭獄而庶人金寶萬計悉
歸居正乃命中貴張誠侍郎丘璉偕錦衣指揮往籍
其家一子自縊死并奪其所賜璽書四代誥命以罪
狀示天下至天啓二年始追述其輔幼功復原官予
祭葬仍特議謚房屋之未變價者給與子孫奉祠居
住

陳大賓

陳大賓江陵人清介豁達以直節自負初授上虞知縣治行卓越選南道御史糾彈不避權貴禽巨猾鄧玉塘爲民患者出按江淮風裁稜稜陞河間知府力行鄉約保甲之法會有大盜不煩兵力平之陞河南副使詰戎務以慎防守歷官藩臬所至民德之輒樹碑立祠以副都御史巡撫雲南賑荒歉正婚嫁民俗大變時總鎮沐朝弼多不法事乃抗論之發錮南京羣黨悉治以罪邊徼遂安陞工部侍郎還尋卒

劉一儒

劉一儒字孟真夷陵人舉嘉靖己未進士初爲刑部主事太宰楊公博愛其才調吏部郎張江陵與儒有姻婭之好江陵嫁女珍寶萬鎰儒緘封于別室戒家人不得啓視時江陵當國而儒出居于南郎聞問通候之啓亦多曠簡江陵敗儒獨不染後陞南工部尚書以病歸逾年而卒雖身歷華腴而家若寒素天下想望其高標焉

曾可前

曾可前字退如號長石荊州石首人爲諸生時風有文名績學篤行寒暑晝夜不輟因是狀類痴癡甲午

舉于鄉辛丑第進士 廷試第三居詞林恂恂若處
子是非利害毅然無所假借甲辰分考所收多名士
未幾念其父年高多疾卽請假歸依依子舍者三年
足跡不履城市父強之赴京勉強一出未幾卽歸友
于諸弟最爲篤至所遺房產悉以讓之邑多水災昌
言于當事者築堤防禦兩遇洪水決堤盡捐已囊以
全活災民其門生爲鄰邑令長歲時餽遺率多謝絕
從未有半紙隻字相聞其敦重名檢類此未幾父卒
以哀毀之過亦卒臨終時猶以手書貽本房門生云
僕僅一子最清弱勿以舉業苦之乃其子鳴世仍能

讀父書于戊午已登賢書矣人咸謂盛德之報云著有石枿館集行于世

袁宗道

袁宗道號玉蟠公安縣人萬曆丙戌會試第一選翰林庶吉士授編脩壬辰告病甲午補原官戊戌陞左中允旋陞洗馬右春坊右庶子未幾卒年甫十二試冠諸生文章膾炙人口弱冠舉于鄉累上春官而始第學淵深宏博粹然一出于正爲人恬夷冲澹不競時趨嘗名其齋曰白蘇蓋以樂天子瞻自寓也二弟宏道中道咸擅才名人比于眉山三蘇焉宏道壬辰

進士令吳江偶以事與當道意左遂棄官偕會稽陸
周望兄弟遍遊武林白嶽台宕五榭而歸久之起爲
國博擢銓曹郎主考陝西未幾卒所著有錦帆解脫
瀟碧齋十集等書皆軼宕可喜超絕處不減蘇長公
而行遊諸記直逼柳子厚鉅錡潭等作洵一代之軼
材也

分省人物考目錄卷之八十

湖廣岳州府

蕭忠

方必壽

徐執中

劉仁宅

李寓

鄧廷瓚

董廷圭

程萬里

黎淳

劉大夏

方宗秩

方昇

謝綱

柳應辰

嚴永濬

顏頤壽

卜馬祥

柳尚義

李如圭

黃昭道

孫繼芳

周廷用

高鵬

武毅

張守約

孫宜

徐貴

馬安

補道

王儼

方鈍

黎循典

艾穆

本朝分省人物考卷之八十

湖廣岳州府

蕭忠

蕭忠慈利人性質直古樸洪武中入冑監任陝西按察僉事貞肅憲度鋤強理冤人稱神明歷山東左布政使以事左遷高密典史永樂初轉江西僉事調廣西卒于途

方必壽

方必壽巴陵人洪武乙丑進士初知宛平以政績著尋擢北平太守歷陝西按察使操履堅確赫然有聲

子廷玉克紹厥緒登永樂乙未進士歷官浙江布政使裔孫純登正德辛丑進士歷知華亭內黃清苦練達召拜監察御史舉劾方面不避恩讐擢大理寺丞

徐執中

徐執中名文贊以字行華容人有文武才略博通經史尤喜談兵與劉必弘遊數相倡和著倡和集執中生元季終身誓不事元洪武間以經明行修舉爲本學訓導遷武昌教諭子一清字希穆亦以薦爲蘇州訓導終蜀

劉仁宅

劉仁宅字廣居華容人大夏父也永樂庚子舉鄉薦
卒業國子正統丙辰拜江西瑞昌知縣躬省田畝教
其民始作織事深山中有流民千餘家邏者往索賂
不得與鬪不勝則妄言民反有司議兵事甚急檄宅
先往宅單騎至山口招之民喜曰劉知縣至矣爭出
自辨宅返命曰無他請以身保兵遂息九江屯兵多
侵暴土著宅嚴立條令執其尤者一人杖殺之皆相
戒不敢犯赤湖河泊所屢涉侵盜民困徵納多竄死
上疏請蠲其宿負若干而更始之瑞昌舊額荻課歲
數十萬而非其產每轉易他所費數倍請以所產粟

新代納民稱其便選爲浙江道監察御史母憂廬墓
三年服闋調南京四川道擢廣西按察副使景泰辛
未守潯州都指揮黃竑殺其異母兄思明知府及其
家七百人以滅口宅與叅政曾暉往治之居月餘盡
得其迹竑父子各擁兵數萬於外以相挾撓聲勢甚
熾宅陽許之乃畱曾于潯爲約而去至南寧竑二子
來迓伏甲士縛之曾亦誘執竑于潯以歸論死竑窮
蹙乃陰遣人上京師造姦謀以邀恩澤果得釋罪且
進位都督旣益橫乃使人摭摭他事中宅以報憾宅
亦上疏自陳事下有司未報委政去成化戊子以子

大夏恩受誥命進階中議大夫贊治尹年八十一卒宅以廣西憲副歸囊惟七金而已正統庚申楊文定以展墓歸里宅時爲御史在京文定過華容便造其家問其子大夏曰汝父在否曰在道中未回曰汝母安在曰適隣家磨麵去矣乃起徧視家中所有遂引大夏詣寢室見牀上惟蒲席布被喜曰所操若是可稱真御史矣事至今尚爲鄉里所傳誦焉

李 騫

李騫字邦傑華容人宣德壬子鄉貢正德癸卯補都察院司務憂歸中丞陳鑑奏奪情起之己陞南京武

選員外郎出補彰德知府成化初晉山西右叅政致仕
爲人廉直敏慎嗜學攻書故所居輒爲人所重
始遊胄監祭酒趙琬大學士王文尤勤愛之爲司務
上封事十四內斥選法一欸爲冢宰所深憾泊守彰
德趙諸王每出郭禱祠遊獵數百里外寯上封事言
之天子遣內侍逮諸王對簿降勅褒獎寯仍命寯
禁約諸王諸王官皆獲重譴已前後獲盜數千咸晉
陽人晉陽人怨寯刺骨湯陰令尚璣者以貪著名寯
屢斥責辱之都御史賈某受其餽庇焉遣人廉寯
靡所獲寯持益堅人率爲寯危寯弗顧也後自山西

歸卜居黃湖山石田茅屋而已足跡不履城市居數載卒

鄧廷瓚

鄧廷瓚字宗器巴陵人生而美質穎悟過人景泰丁卯年十八登湖廣鄉舉用戊戌擢進士第明年授知浙江淳安縣抵任訪民疾苦專施惠政不求赫赫名終九載人無知之者時兵部尚書王鵬以都御史巡撫廣西獨知之薦知梧州疏且上會丁嫡母憂不果服闋遷太僕寺丞十年貴州新設程番府府在萬山中百具未備加以夷獠雜聚猝難撫治以廷瓚知梧州

至則悉心規畫凡城郭街衢及廟宇廨舍以次興造
榜諭諸夷使受約束政令公平莫不感化時以治績
異等交章薦舉吏部以良夷方安宜久任以慰之滿
九載始擢山東左叅政提督農兼管水弘治元年戊
申再擢本司布政使二年擢右副都御史巡撫貴州
丁母憂服闋適貴州黑苗久叛勢益橫肆守臣告急
仍勅往視兼提督軍務初至百計招撫不從始合衆
謀儲糧調兵決策征勦兵至其地號令嚴明將校用
命斬首幾六千級生獲二十餘口械首惡數輩赴京
悉斬於市六年寇既盪平上奏都勻清平舊設二衛

所屬合九長官司其人世祿驕縱稔惡釀患致夷人
侵田奪貨逞欲無厭已四十餘年於此軍疲於戍守
民困於轉輸其害不可勝言今幸黨惡削除非大更
張不能爲保境安邊之計凡所條陳十一事下兵部
會議悉見施行始設都勻府一獨山麻哈州二清平
縣一更擇流官土官兼治初遣子之乾入京報捷
朝廷受乾以錦衣衛所鎮撫下 詔褒嘉有首決用
兵之策共成平賊之功之語進右都御史召還掌南
京都察院事數月復鎮兩廣以安靜爲治屬吏有賢
勞者輒舉薦以勵其餘或不職特去其一二太甚者

若諸司濫設悉奏除之曰祿俸出於民無徒費也會
鬱林川雲爐大桂諸種作亂以次平之其後四會等
處乘機竊發其勢尤熾未幾首惡李景先覃傑暨黨
二百餘人悉被斬獲兩廣竟亦無事璜出入溪谷衝
冒瘴露亦已疾矣十年上章乞歸甚懇 賜詔勉畱
特遣醫往視仍進左都御史以酬其功十四年 上
知久勞邊務 召還復掌南京都察院事未行以疾
卒享年七十一贈太子少保諡襄敏

董廷圭

董廷圭字國器華容人景泰庚午鄉試第一人辛未

進士拜監察御史時西北多事邊備廢弛命守白羊口廷圭至屢疏軍中利病有守帥暴橫劾去之清理河南積歲隱匿私役者令之補伍凡五萬人都御史李秉林聰極加禮遇臺中章奏及讞獄咸賴之值經筵糾論講臣會四方災異上言彌災十事擢山東副使監司疑獄必付之有薦爲巡撫及太僕卿者大臣修前忿竟寢格不行人或勸以少貶徇時廷圭曰枉已以覲榮顯吾不爲也其砥節履方類若此歷任中外家無寸土比歿殯斂皆鄉里賻助

程萬里

程萬里華容人天順丁丑進士成化初授吏科給事中封駁得體嘗上疏言用賢圖治疏通人才慎選風憲皆切時政累官戶部右侍郎致仕家居嘯歌山澤托志恬曠所著有閑情集

黎淳

黎淳字太樸華容人少苦志問學從父宦遊與兄共相師友天順丁丑英宗復位舉進士第一授翰林修撰預修大明一統志癸未同考禮部會試成化乙酉憲宗卽位克經筵講官丙戌遷左春坊左諭德丁亥修英宗實錄成進左庶子甲午考順天鄉試

丁酉修資治通鑑綱目成遷詹事府少詹事兼翰林院侍讀 孝宗正儲位日侍講讀戊戌擢吏部右侍郎丙午改南京吏部丁未九載遷左侍郎弘治戊申擢南京工部尚書尋改禮部又三年以疾致仕而卒於家謚文僖淳天性耿介寡合尤好直言居官屢除弊事初入翰林有以言弊謫者卽以書抵當道請救其人當道者雖不用然心實重之鄉試卷竒甚後場不類疑有弊勾稽墨卷果得謄錄生截卷狀按其事而取其卷爲解首則名士馬中錫也人皆稱服常見天下鄉試錄多舛繆或犯國諱摘奏數十條下禮部

翰林院議治考試提調官罪具申定格例行之及在吏部不受私餽不行請囑尤慎形跡事涉矯訐輒窮本末必暴白乃已聞人有玷行雖所甚愛必摧抑不曲爲庇覆下至胥隸亦畏憚不敢犯素俗朴患鄉俗好侈躬自裁抑婚葬飲宴之禮人多視以爲則嚴取予教子不假辭色至訓諸生日疊疊不倦登科甲仕中外者相接踵門下胥吏有嚮學者輒優給役後亦多成名者平生好著述有龍峰集若干卷及輯國
家諸試錄合六百四十卷藏於家

劉大夏

劉大夏字時雍華容人天順甲申進士改庶吉士初
內閣李文達彭文憲二公欲畱官翰林大夏與安福
張敷華力辭不就識者已知其有經世之志初補兵
部主事於疆場之事多所討論及歷員外郎晉職方
司郎中益侃侃自樹不隨世趨俛仰時 朝廷好寶
玩中貴希旨言宣德間遣王三保出使西洋等番其
所獲奇珍異貨無算 上然之命中貴至兵部查勘
水程尚書項忠使都吏於庫中檢舊案大夏先入檢
得之故匿其籍都吏檢之不得數被捶若弗聞者會
科道連章諫其事遂寢後項呼都吏曰庫中案卷安

得失去大夏徐以利害告之曰三保太監下西洋時
所費錢糧數千萬軍民死者亦萬計縱得珍寶於國
何益此一時弊事大臣所當切諫者案雖在亦當毀
之以拔其根尚足追究其有無哉項聳然降位再揖
而謝之指其位曰公陰德不小此位不久當屬公矣
時北虜數寇雲中邊帥失利中外震驚調發戰守無
虛日每報至尚書必曰劉郎中云何所言輒行行之
輒效時右侍郎缺中官有欲薦之者遣人言於尚書
冀一往見大夏巽詞謝之自求外補出爲福建叅政
奉 勅巡海海道兵久弛而倉儲久耗卒難就理大

夏謀於鎮巡首選衛所軍政官而擇其尤者總諸水寨兵造戰哨船各若干艘葺倉計儲立收支法寨設一官而親督察之不半年海道肅然弘治二年陞廣東右布政時監督諸軍平後山賊軍人俘賊萬數中有一女子儀容閒雅步止羞澁呼問乃潮州士人家女被賊擄去長欲收爲妾蠻婦妬忌育以爲女也大夏惻然閉在一室令二老婦守之大夏問其所願答曰願回本鄉大夏曰回鄉須差軍護送千里之程豈勝汗辱乎乃擇里長倪某者嫁之且以數牛賜其家耕作踰二年轉浙江左布政會河決張秋擢右副都

御史往治焉既至乃集山東河南二省守臣議以事
關運道莫敢適主大夏曰河性猛悍張秋乃下流喉
襟未可輒治治法於上流分道南行復築長堤以禦
橫波且防大名山東之患俟其循軌而後決可塞也
遂疏孫家渡河三十里四府營河十里築長堤起河
南胙城盡徐州經長垣東明諸縣長三百六十里量
能任功五旬而事竣進左副都御史理院事歷戶部
左侍郎弘治丁巳 命兼左僉都御史總督宣大瀕
行周司徒經懼其以剛取禍大夏曰處天下事以理
不以勢定天下事在近不在遠俟至彼圖之至則召

邊上父老日夕講究得其要領一日揭榜通衢云某倉缺糧幾千石某場缺草幾萬束每石每束及官價若干封圻內外官員客商之家但願告報者米自十石以上草自百束以上俱准告雖中貴子弟不禁也不兩月倉場積蓄有餘踰年上章乞致仕孝皇特旨令馳驛歸養病庚申進右都御史總督兩廣軍務勅使臨門卽攜二僮以行兩廣人士聞其來如饑兒之得乳母旌賢才斥貪穢裁冗費更役法上下不便者一切止之廣人駸駸樂生矣十四年辛酉土官黃理殺嫡謀襲大夏捕理誅之壬戌召陞兵部尚書遂

以安內攘外爲已任十六年癸亥四方奏災異幾旬
四五月無雨遂引咎求退且言兵政弊端上不允
令開具弊端卽陳十事孝宗一一准行之自是委
任益隆甲子有以近戚干干上求得北邊總兵者一
日朝退獨召大夏授一帖子啟視之乃硃書某人姓
名也退至部語同列曰上旣令兵部推舉只當以
堪任者聞如某人才望非帥臣選終不可從明日推
某某以請上徑從內批出用李某其人到未久被
劾取回他日大夏獨對上乃曰向用李某蓋不得
已今事敗朕悔不用卿所舉之人也六月北虜小王

子遣使求貢甚急又燒殺墩軍大同守臣以聞大夏
具奏北虜大衆卽今在宣府地方住牧亦有東行者
若寇宣府山勢險阻若寇大同有延綏遊兵在此必
與朶顏相通畱虜衆於宣大邊外以制我兵乞揀精
銳官軍於永平密雲二處相機截殺仍揀集順天真
定等八府民兵備護京師 上以兵事入中官苗達
謀出兵于塞外大夏力言不可 上曰永樂頻出塞
破虜今何不可對曰 皇上聖武固同於 太宗柰
今將領遠有不逮令各邊料敵戰守猶似得策 上
乃悟曰朕幾爲人所誤事遂止 上益明習國事有

大政大疑必召至內殿面與叅決嘗召問天下衛所
軍士何如對曰江南衛所困於運糧江北衛所困於
京操此外浪費猶有臣等不能知者 上翼日詔各
衙門凡有損於軍民弊政悉疏以聞 上欲於附近
地方團操人馬以爲京師左右被對曰京西保定府
地方獨設都司統五衛仰思 祖宗恐亦是此意遂
勅京營都指揮戴儀往任其事乃有造飛語帖於宮
門誣大夏 上曰宮門豈外人可到必此曹忿不得
私役此軍者所爲耳及修清寧宮有 旨下兵部撥
用軍夫萬餘人做工大夏知工少人多蓋監督中官

有所利而爲此也上言減去十分之五十八年乙丑
春召大夏與左都御史王珊入各對畢上令中使
出白金二錠以賜且面諭曰卿等將去買茶用朕
聞朝覲日文官避嫌有閉戶不與人接見者如卿等
雖開門延客誰復有以賄賂通耶朕知卿等故有是
賜上一日召大夏面語曰事有不可每欲召卿商
量又以非卿部內事而止今後有當罷者卿可寫揭
帖密封進來對曰陛下所行宜遠法帝王近法
祖宗事之可否外付之府部內咨之內閣可也如用
揭帖日久上下俱有弊且非後世法臣不敢效順

上稱善久之又一日召大夏因言天下何時太平對曰求治不宜太急但凡用人行政有疑者卽召內閣并執政大臣面議停當行去自然順理便是太平大夏每被 召入廷奏事至跪御榻前欲起不能 上命司理監李榮扶掖出左順門外榮囑之於 上前隱惡揚善大夏曰 聖上天性聰明其於政事外曷敢輕易毀譽人乎大夏雖職本兵苟可扶善類存國是知無不言言無不聽戶部郎中李夢陽建言指斥政事之非者 上怒下夢陽錦衣獄一日批鎮撫具獄詞以獻有 旨令夢陽復職他日獨召大夏奏事

畢 上曰近日外事若何大夏頓首曰近有旨釋李
夢陽中外懽呼 聖德如天 上曰李夢陽本內事
關戚畹且語言狂妄朕不得已而下之獄朕試問左
右當作何批行一人曰此人狂妄宜付錦衣撻以釋
之朕揣知此輩意欲得 旨下便令重責致其死以
快宮中之怒使朕受殺直臣之名左右不忠如此朕
所以卽釋復職更不令法司擬罪也大夏頓首謝曰
陛下行此一事堯舜之仁也又刑部尚書閔珪譏重
獄忤 旨批答久不下一日大夏獨對 上因語及
之對曰人臣執法不過效忠朝廷耳自古聖帝明王

往往屈意從之閔珪所爲無足疑者上曰且道自

古何君何大臣亦嘗如此對曰臣幼讀孟子內見舜

爲天子臯陶爲士瞽瞍殺人臯陶亦執之而已今之

法司恐事亦出此似未可深責也上頷之明日旨

下一依刑部所擬弘治末年召對便殿大夏言三營

軍士多被占役騰驤四衛軍士投克太濫各營草場

侵欺隱沒甚多議裁革節省上首肯久之且諭以

勿形奏疏蓋恐權貴中傷之方將有所釐正而龍馭

不久上賓矣四上章請老乃從之正德時逆瑾用事

日誅求臣僚欲中害之昌言云抄沒大夏可得金數

馮瑾因尚書潘藩總兵毛銳獄詞連大夏姓名戊辰
遂矯制差錦衣衛官校逮之八月至京繫北鎮撫同
繫者教其行賂爲求生計大夏曰如此而死唯累一
身稱貸免死則累一生且累子孫矣瑾怒欲置之羣
會官議於朝堂左都屠蒲曰檢律劉尚書無死罪瑾
曰克軍罪亦無耶法司比附守禦官撫馭無方致所
部軍人反叛律克軍十月遣戍肅州出都城日氊帽
布衣徒步過大明門匍匐頓首乃行觀者如堵所在
罷市父老涕泣士女攜筐饁進果食亦焚香密禱曰
願公生還已巳四月到配所披甲持銳與卒同又買

地作墓爲終身計人問其何不挈親子姓侍行大夏
曰吾仕宦日不能爲子孫乞得一官今克軍老死顧
令子孫補伍豈人情所安耶庚午夏京師風霾蔽天
寘鐺叛亂肆赦天下大夏得釋歸八月瑾誅復原官
致仕卒贈太傅謚忠宣

方宗秩

方宗秩字伯序巴陵人通春秋一試文場不第遂歸
隱淹貫子史尤善詩詞耕桑樵採自食其力勵志無
求真有伐檀遺風其鄉人之子弟有所疑難講解者
多於畊畔求之天順間知縣袁綱以經明行修舉不

就太守吳公亦嘗延之賓館質問理道其抗節養高如此

方昇

方昇臨湘人成化乙酉鄉薦第一登丙戌進士性寧靜有文行楊少傳一清嘗從之游拜監察御史所接治處咸著清直聲有所奏劾不避權勢時稱真御史尋遷江西按察副使卒于官卒之日篋中惟衣服二三襲士大夫賢之

謝綱

謝綱字振倫巴陵人成化己丑進士知高安縣有豪

氓素強梗綱諭以利害從容化誨之竟革心爲善徵
拜監察御史清戎四川河南所至咸著風采擢山東
按察副使所著有素軒文集

柳應辰

柳應辰字拱之巴陵人成化己丑進士歷官刑部郎
中擢四川兵備副使以憂去服闋補河南進山西按
察使歷山西陝西布政使陟副都御史巡撫蘇州威
惠兼著風采凝然逆瑾用事乃撫其清理莊田不實
械繫詔獄褫秩歸瑾誅復職致仕

嚴永濬

嚴永濬字宗哲華容人成化戊戌進士庚子授戶部主事督儲臨清縮財用慎出納吏罔招權民無犯法癸卯督餉宣大計事量物益殫心計余肅敏公敬而禮之乙巳陝西大饑奏捐稅四十萬接濟邊儲全活數萬人是歲以憂歸戊申服闋復除戶部主事己酉遷員外郎庚戌擢郎中尚書李恭命總諸司章疏壬子出守西安府治常循謹不事煩苛屬吏有撓法者治之曲法者懲之奸惡者黜之秦俗獷悍以禮化導漸以謙謹撫按藩臬文案山積迎刃立剖庭無宿牒先是西安歲織絨服進用中官監造秦民苦之永濬

疏論其害不報嘗構書院簡三學諸生賢者才者萃而教之于是康海王九思馬驥諸名人出焉故永濬當弘治時名甚著濬爲人性直學醇砥節峻以亢故其發爲忠諍義形於色義所蔑視卽當路貴要人勿畏也在任九載擢浙江叅政卒所著有兩山集

顏頤壽

顏頤壽字天和號梅田巴陵人成化癸卯舉于鄉弘治庚戌登進士授河南寶豐知縣調治淇縣徵貴州道御史四川倉庾積弊不可根詰詔壽往清理之稽覈詳明吏不敢隱正德改元奉命按廣西代還陞光

祿少卿轉大理尋陞右僉都御史以母憂歸起復陞
右副都御史巳卯宸濠不軌事露上命壽同司禮
太監溫祥駙馬崔元往勘濠起兵反南昌將犯金陵
壽至浙急馳反狀以聞內外警備濠黨就殄世廟
卽位進刑部左右侍郎元年欽賜獻皇帝御書明
年陞南京禮部尚書改南京戶部先是武宗南狩
糜費不貲帑庾告匱壽上疏言南京根本重地倉庫
無數月之儲大可隱憂乞畱浙廣儲省免運米十萬
石以裕軍餉上可之轉南京吏部遷都察院左都御
史轉刑部侍郎山西妖賊李福達事洩屬壽鞠治福

達首亂者也捕急達不能逃乃懷重貲走都下陰結
貴倖爲救援地先易名李五復易張寅壽鞠狀甚悉
援謀叛律議處死奏請裁奪上不可壽執之堅再
奏再不可壽執之逾堅三奏又不可重忤上意其
執如前也復懇疏曰陛下知徐溝之張寅爲無干
未知其先洛川之李五淳縣之李福達也又曰臣下
自執特誤陛下失之輕縱異時人心搖動復如洛
川之福建臣卽死莫逃欺罔之罪會廷臣間承風指
奴賊竟以疑罪得逃乃下壽獄奪職閑住子姓每
輒諭之曰奉公守法毋辱門祚至願也富貴奚羨也

人或售以田宅則曰吾宦卽久了吾餘藥且不使子孫累吾清白家聲母吾強也年七十七卒祀鄉賢祠

卜馬祥

卜馬祥岳州人成化中任指揮同知流賊掠洞庭祥奮身督戰身被流矢勇氣益倍以後援不繼陷陣而死

柳尚義

柳尚義巴陵人弘治己未進士授知縣徵拜監察御史累陞僉都御史以忤逆瑾除名瑾敗復起副使仕至叅政卒義明於大體執正不回當逆瑾竊柄時朝

出羊出門下士風漠忍如茅斯靡如義者亦可謂嶽
時鋒銘矣

李如圭

李如圭澧州人登弘治己未進士授江西安福令首
擒豪俠數輩寘諸法邑中肅然調建安時華林盜賊
充斥乃陰設間殲其渠魁居民安堵入爲御史按福
建貪酷吏望風宵走尋丁內艱終制不起者十餘年
巡按何鰲薦其才復起廣西兵備副使陞陝西按察
使未之任擢都察院右僉都御史會延綏大饑廷議
賑濟薦圭才堪任用乃列疏薦十餘事請得便宜行

事 上可其奏至則問疾苦嚴法戒大布賑濟之策
全活數萬人感惠立祠祀之事竣總理河道多方疏
濬易置閘座修固堤岸引諸湖水接濟河流由是糧
運無阻黃河徙決爲患最大要在疏導淤塞爲先戒
飭沿河州縣依法造舟用鐵扒尖鋤駕舟順流隨方
開濬故水得其道無衝決淤溢之患進兵部右侍郎
改吏部尋陞戶部尚書時逆胡犯邊圉臣告急度其
緩急先後疏請以次解發帑金庾粟無慮數十萬軍
餉賴焉嘗書弘濟艱難四大字以自勵以不善事權
貴勒令致仕以歸卒于家

黃昭道

黃昭道字文顯平江人弘治己未進士知長山縣歲
蝗禱神雨雹交作蝗盡死人咸異焉拜監察御史以
忤逆瑾廷杖除名瑾敗起江西僉事時宸濠招集亡
命劫掠彭蠡諸處爲梗昭道捕獲數百人悉訊治如
法轉山東巡海副使遷雲南叅政時木邦孟密緬甸
諸夷警殺多年當道莫能禁昭道至諭以利害咸誓
服懽騰虔修職貢又普安賊安銓武定鳳朝文糾黨
爲叛昭道以本省右轄提兵誅之降其餘黨轉右布
政使尋有詔召還辭疾歸屢薦竟不起家居十四年

杜門謝客興至每攜賓從登天岳諸山觴詠爲樂病
卒昭道性誠坦凝定克濟大事論者謂爲今之古人
云

孫繼芳

孫繼芳字世真華容人正德辛未進士初爲刑部山
西司主事是時宦官勢盛東廠獲數人誣以爲盜下
刑部論尚書命繼芳治之鞠知其寃卽白尚書曰此
人寃非盜可寃平民哉卒釋之御史張璞劉天和王
廷相迂宦官逮繫獄疏救不報因謝病歸起改兵部
車駕主事陞職方司員外郎 毅皇將南巡武選郎

黃鞏與繼芳百餘人諫止 上大怒咸廷笞之繼芳
得不死尋改職方掌軍國機務及諸邊鎮籌畫曹務
繁重繼芳日談笑爲之至奏草時命一吏執筆旁立
口占以書奏成咸明切引繩墨中事情未幾以部尚
書相牴牾外補雲南提學副使卒誣謫黜之歸繼芳
性慷慨激亢當其氣所欲言雖萬乘勿畏也其爲提
學雲南時數以事與都御史御史爭不少屈繼芳受
學何景明稱高足弟子其文尚典實叙述紀載有班
氏風所傳詩僅百餘篇皆精語

周廷用

周廷用字子賢華容人正德辛未進士授知宜黃縣擢陝西道監察御史廷用靈心淵濬超融剴爽氣倜儻豪岸不宜于俗而獨下意名品自舉進士至列臺憲殫力問學寒暑勿懈體超格異詞鋒汎湧援筆作賦爛然成章巡按貴州獠寇帖伏時擬內遷已疏詮部辭直氣烈當事者思有以厄之未一考補外爲僉事旣叅議福建與尚書林俊論詩文于壺山之陽學益進兵備四川有征芒部功試科舉士率精實無謬及掌江臬凡縉紳大夫以書問至者命二吏于廳事公折之請囑咸廢格不行而居蜀時其嚴峻亦若此

于是怨毀交集謗訐沸騰會入覲都御史汪鉉摘黜之廷用生平不喜迎合濶視放言論人長短略弗旁顧而天下之文人騷客則又忘勢與交推讓延譽且廉介之節終始弗渝所著有八厓集若干卷古賦樂府及五七言詩庶幾乎漢魏李杜之間子槐領鄉薦歷宰二縣

高鵬

高鵬澧州人器識超異少聘周偉女病癰瘕周恐艱于櫛沐議辭婚不可竟委禽焉相與無間言姻黨賢之後舉正德中進士以戚畹外補知南通州廉慎有

爲境內蝗旱復多火患鵬多方賑援卒不爲害尋謫
霸州以禁奸摘惡爲權璫所誣逮降雲南寧州同知
陞杭州府通判卒

武毅

武毅華容人累官都督僉事爲叅將守廣西智勇過
人馭下嚴明多樹戰功爲蠻夷所憚服

張守約

張守約字彥博岳州人嘉靖丙戌進士授知蜀華陽
縣憂歸服闋補崇德轉南京大理評事擢知淮安府
淮安素號難治守約聞命卽遣妻子歸束裝携二僮

子抵任闢園植蔬自奉儉約禁絕官市常俸貯之帑
藏間出以賑困乏守約御家人甚嚴峻唯麥粥鷄衣
不許毫髮干與外事二僮子咸憤恚思逸弗可出遂
乘守約臥害之撫司震悼具棺爲殮寮屬暨諸生吏
民檢用所遺唯二敝篋篋中書數束敝裘數襲而已
衾縛帷幄咸綴浣汚裂靡堪用者其廉如此

孫宜

孫宜字仲可一字仲子華容人稍長能屬文爲詩賦
嘉靖戊子舉于鄉後數試不第詩文日工辛丑罷試
病臥四年息心世故家在洞庭湖上自稱洞庭漁人

著七遊以見志已又著遁言十七篇年三十八不復就試禮部不謁公府五十歲而卒宜有盲吏腐史之才顧獨以畸操介行不屑世趨尚書霍韜欲以誥勅事特薦竟固謝之所著洞庭漁人集五十卷已傳岳州府志洞玄志明初略藁藏其家

徐貴

徐貴平江人由舉人授四川潼州州同知力甘清苦爲政嚴明後以剛直忤臺官謝政歸家居灌園種蔬窮約如寒士嚴飭周防不失尺寸鄉里目爲古君子

云

馬安

馬安石門人父喪膝行負土成墳廬墓三年有司以聞旌表其門

補遺

王儼

王儼字民望號畏齋華容縣人天順壬午舉于鄉成化己丑登進士壬辰授兵部職方主事陞刑部員外郎踰年擢本部郎中甲辰遷四川成都太守廉靜剛果歲餘異政疊出成都大治以母憂去起復改守衛輝以治成都者治之當道推荐咸以爲治郡第一甲

寅擢河南右叅政丁巳擢陝西右布政使時上方有旨購玉十二番諸夷以玉赴鎮守劉琅琅卽檄布政使取萬金以售執不可後朝廷以玉僞黜琅深愧謝已未冬擢副都御史巡撫山東入境卽樹風聲慨然有澄清之志未幾高唐州秀才楊才顯以戲博與黨友艾鑑有忿誘殺鑑并殺其妻子三人鑑兄剛往視隣里誣執不能辨州杖殺之其子玉名繫官亦垂死鞠理疑焉一日出旋風逐輿心動曰異哉梧丘之怪也乃佯不理使人按其踪跡得才顯情狀捕問之獲刃于井獲血衣于學宮遂伏誅自後奸猾震懼山

東土民服其擿伏如神維時榆林虜入寇乃陳籌邊
四策 上咸嘉納庚申八月晉戶部右侍郎清忠鯁
亮終始不渝受知 孝廟多所眷注崇王侵民田業
事聞 命理之至河南悉歸侵地于民進左侍郎戚
畹張延齡周壽恣勢凌人強奪民業勘之抗疏以聞
上嘉其直北虜恣寇遣師徂征 上賜璽書 命
督理糧餉輿疾至宣府百方計處得粟數十萬石以
濟無何逆瑾竊柄凌轢大臣素惡其剛正以督餉藉
誣罪令金吾械繫至京時理者廉其無罪 詔免歸
瑾以弗謝而去怨如舊尋以奏減勇士布復矯旨下

錦衣衛獄幽滯圜踰歲謫戍三萬衛至戍所屏居
僧舍日檢方書適安化王謀反事寧大赦始得歸瑾
以逆誅 詔復舊職辛巳夏 世廟卽位給事中邢
寰御史唐符先後論其守正遇害應進階錄用 上
特命有司以禮存問亦殊典也未幾卒享年八十有
八

方 鈍

方鈍字仲敏湖廣巴陵縣人正德十二年進士由華
亭知縣選廣西道御史嘉靖十年巡按河南山東陞
大理寺丞累陞戶部尚書抗嚴相調南致仕

黎循典

黎循典字成五湖廣華容人舉人嘉靖甲午授知平
湖縣事興學校省刑罰均徭稅催科不擾和易近民
按浙江者考其愛民如子體國猶家令衙區其門爲
愛民體國者蓋實錄也擢監察御史人思慕之有去
思碑記立于西關津

艾穆

艾穆湖廣平江人嘉靖戊午舉人爲部郎時正值江
陵奪情視事與沈思孝等抗疏力陳其不可奉 旨
廷杖謫戍江陵物故起原官歷南鴻臚卿陞太僕卿

穆氣節矯矯而所至亦以功名顯云